

# Patentin de ladin ence te la graduatories provinzièles

L conseier ladin Giuseppe Detomas à prejentà na mozion percheche vegne tegnà cont de la prezedenza assoluta ence ti concorsc de la Provincia

**Patentin de ladin** - L. Statut de Autonomia e la lege provinzièla nr 6/2008 recognosc, descheche se sà, l derit de durèr l lengaz de mendranza sul teritorie olache stès la mendranza ladina e donca te Fascia, ence ti rapore con l'amministrazione pubblica.

Un di strumenc più emportanc per garantir chest derit e en generèl per defener e sostegnir l lengaz ladin l'è l sistem de prezedenza assoluta per l'azess ai posé publics per chi che à l'atestat de cognoscenza del lengaz

ladin, chest vèl per la graduatories di concorsc publics e per la seleziions de personal, ence temporanes, metudes a jir dai enc locai del teritorie ladin e dai enc publics per chel che vèrda l personal che jissa a corir encèries ti ofizies che à sia senta demò ti Comuns ladins de la provincia de Trent.

La lege perveit na limitazion teritorièla per l'aplicazion de la prezedenza (demò per i concorsc di enc che à sia senta tel teritorie fascian)

ma de fat l'è ence seleziions de personal che vegn fates a livel provinzièl e dapò, te n secondo moment, dò aer fat la graduatoria, pel esser assegnà n post vet te Fascia (o te n ofize che à competenza per Fascia) a chi che fèsc pèrt de la graduatoria provinzièla ma che no é en possess del patentin de ladin, e coscita no vegn aplicà l derit de prezedenza assoluta.

Su chest l'è entervegnù enstadi l conseier ladin Giuseppe Detomas de la UAL con na mozion portèda dant

te Consei provinzièl che disc che "l prinzip de determinazion teritorièla cogn aer valuta per indichèr l teritorie de la comunanza de mendranza, ma no cogn rapresentèr n limit per i intervenc a defendura e sostegn del lengaz de mendranza. L prinzip de teritorialità per la sconanza di lengac e cultures de mendranza l'è dò che l doventa, ence per efet de la reorganisaziions di ofizies amministratives, massa strent."

Con chesta convinzion l conseier

Detomas à domanà che l Consei empegne la Jonta provinzièla a fèr a na vida che, con referiment ai concorsc publics endrezé sul teritorie provinzièl, per l'assegnazion de posé vec te ofizies che à sia sentes ti Comuns de Fascia, ti bandi de concors vegne metù ite clausoles per l'aplicazion del prinzip de la prezedenza assoluta, a condizion che l personal sie en possess del patentin de ladin. La proponeta de mozion é stata litèda da duc chenc.